

Pidato Pasambahan Manjapuik Marapulai : Pambuka Kato

Contributed by Damrus Lukman (Paduka)
Tuesday, 03 June 2008
Last Updated Tuesday, 03 June 2008

Ujuang :

Assamu’alaikum wr. Wb.

Pangka :

Wa’alaikum salam wr. Wb.

Ujuang :

Maa baliu, Datuak ….

Pangka :

Sambahkanlah, Datuak ….

Ujuang :

Ka bakeh Datuak pulangnyo sambah ambo, mah Datuak ….

Pangka :

Kapado Allah kumbalinyo, mah Datuak ….

Ujuang :

Ikomah sambah nan ka ambo pulangkan ka bakeh Datuak. Pendek komah Datuak, kapendek-an nyo itu iyo nak basingkok daun ka batariék buah sajo. Sakiro-kiro nak mangatokan kato hati, nak mambanakan kato bana. Manolah kato hati nan ka dikatokan, kato bana nan ka dibanakan, di sinan kan takana pulo ambo dek rawi orang tuo kito :

Anak ikan dalam tabek

Tabek nak urang koto tengah

Gambo tajelo dalam padi

Kato dahulu basicapek

Kato kudian basitinah

Lai kolah raso ka manjadi

Pituah juo molah ambo ka dibari, mah Datuak....

Pangka :

Lah ukue sampai, Datuak....

Ujuang :

Bilang sakiro itu lah, Datuak....

Pangka :

Bana pulo tumah sapanjang panitahan tuan Datuak ka tengah

Iyo anak ikan dalam tabek

Tabek nak urang koto tengah

Gambo tajelo dalam padi

Iyo kato dahulu basicapek

Kato kudian basitinah

Alah raso ka manjadi, mah Datuak...

Ujuang :

Lah ukue sampai, Datuak....

Pangka :

Bilang sakiro itu lah, Datuak....

Ujuang :

Indak lai doh, dang dikatokan lah dapek ambo aie nan bak satitiek, rantiang nan bak sasakah, walau kato nan sapatah, lah baiek manyanang hati ambo, mah Datuak...

Pangka :

Dang dikatokan hati tuan lah sanang, hati ambo lah baitu pulo, mah Datuak....

Bersambung ...

Note :

Pidato pasambahan Manjapuik Marapulai, disusun oleh kawan-kawan di "Kacimpuang Pamenan Mandi" di bawah arahan Halvi Hamid Mangkoto Sati, yang anggotanyo terdiri dari anak Nagari Muaropaneh Kabupaten Solok nan ado di Jakarta dan sekitarnya.

Naskah ini telah beberapa kali dikaoan (dipraktekkan) dalam acara manjapuik marapaulai manjalang baralek di gedung atau di aula. Diharapkan naskah ini dapat membantu memberikan arah dalam acara pidato pasambahan.

Semoga bermanfaat.